



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Comiti Tripolitan.

urn:nbn:de:hbz:466:1-20006

revelabitur in nobis, monemus universitatem vestram & exhortamur in Domino quatenus ad memoriam revocantes quod tribulatio patientiam operatur, patientia verò spem, spes autem secundum Apostolum non confundit, ex hoc ipso gratias agatis Altissimo, quod illi de quibus indubitata fiduciam habebatis, retribuentes mala pro bonis, vobis non cessant detrahere, quia sequimini bonitatem; & quanto mundus, qui vos odit, quia de mundo non estis, (alioquin quod suum esset diligeret) persecutiones vobis excitat graviores, tanto amplius patri luminum, à quo est omne datum optimum & omne donum perfectum, in gratiarum actionibus assurgatis, qui vobis dedit patientiam in adversis. Despecta est enim confessio quam facit prosperitas, teste scriptura, quæ dicit: *Confitebitur tibi, cum benefeceris ei.* Sed illa magni momenti debet existere, quam non adimit vis doloris, ejus exemplo qui ait: *Si bona suscepimus de manu Domini, mala quare non suslineamus? Sicut Domino placuit, ita factum est. Sit nomen Domini benedictum.* Nos autem, qui locum ejus licet indigni tenemus qui juxta propheticum testimonium liberavit pauperem à potente, & inopem cui non erat adjutor, affectu paterno vestris doloribus condolentes, non attendimus contra vos vultum potentis, sed ut oppressionibus vestris finis debitus imponatur, spe sola retributionis æternæ Petri gladium exeruimus ad justitiam faciendam, discretionem vestram rogantes attentius, & obsecrantes in Domino, quatenus hanc nobis retribuatis mercedem ut apud misericordissimum judicem pro peccatis nostris preces & lacrymas effundatis, puras ad eum manus sine disceptatione levantes, ut injunctum nobis apostolatus officium ad laudem & gloriam nominis sui, ad honorem & profectum Ecclesiæ, & redemptionem & salutem animæ nostræ concedat & faciat adimplere. Datum Laterani XII. Kal. Decembris.

AIMERICO ILLUSTRIS REGI
& A. Reginae Hierosolymitan.

Epist. 437.
Regnum Hierosolymitanum sub protectione apostolica recipit.

Cum terra sancta, in qua pedes Christi steterunt, & salutem nostram Deus Rex ante secula dignatus est operari, sub protectione semper debeat sedis apostolicæ permanere, quæ Domi-

no disponente mater esse meruit generalis; licet omnibus ad vindicandam injuriam Iesu Christi & ipsius terræ succursum accedentibus munimen protectionis apostolicæ largiamur, vobis tamen, qui terræ illi temporaliter præesse noscimini, tanto libentius favorem & gratiam apostolicam impertimur, quanto patrocinio & auxilio nostro amplius indigetis, & tam regnum vestrum quam vos habemus inter alios mundi Principes cariores. Eapropter, carissimi in Christo filij, vestris justis petitionibus grato concurrentes assensu, personas vestras, regnum Hierosolymitanum, & cetera omnia quæ nunc rationabiliter possidetis, vel in antea justis modis præstante Domino poteritis adipisci, sub beati Petri & nostra protectione suscipimus, & præsentis scripti pagina communimus. Decernimus ergo &c. Datum Laterani IV. Nonas Decembris.

COMITI TRIPOLITAN.

IN afflictione terræ sanctæ, quam Dominus pretioso sanguine comparavit, nos vehementer affligimur, & dolor noster quotidie innovatur, & donec eam pristina restitutam cognoverimus libertati. Sanè licet instantia nostra quotidiana sit omnium Ecclesiarum sollicitudo continua, præcipuum tamen ad liberationem dominici sepulchri nos & fratres nostri sollicitudinis studium exercemus, ad subventionem ipsius cunctos assiduis exhortationibus invitantes. Nuper autem cum literis plurium de partibus transmarinis sedi fuisset apostolicæ nuntiarum quod carissimum in Christo filium nostrum Aimericum illustrem Regem Cypri tu & alij unanimiter elegeratis in Regem, per quem transmarinæ terræ tam ex districtione personæ quam affluentia rerum creditis posse salubrius provideri, eum à quo bonum omne procedit humiliter exoravimus ut Regem ipsum de inimicis Christiani nominis faciat triumphare. Cum igitur prædictus Rex, sicut etiam in literis nobis transmissis perspicitur contineri, quietem regni Cypri dimiserit, & pro Christi nomine labores subierit transmarinos, & tibi & aliis omnibus summa sit sollicitudine satagendum ut regnum Cypri non debeat aliqua tempestate turbari, sed tranquillitate gaudere, cum de regno illo Hierosolymitanum regno, ut proponitur, multa sub-

Vide infra epist. 518.

Epist. 438.
Vt Regi Cypri contra Sarracenos decretum in conferendo & gubernando regno auctoritas sit.

ventionis commoda ministrentur, nobilitatem tuam rogamus, monemus, ac per apostolica scripta mandamus, quatenus præscripto Regi, si quando necesse habuerit, ad defensionem regni Cypri sic libenter & efficaciter, quantum salva defensione terræ sanctæ potueris, auxilium tuum impendas, quod idem Rex gratum merito habere debeat & acceptum, & tu tanquam catholicus Princeps ad ea quæ terræ Hierosolymitanæ commodum respiciunt & augmentum, videaris sollicitus & attentus. Datum ut supra.

In e. m. nobili viro Principi Antiocheno. In e. f. m. Magistro & fratribus militiæ Templi. In e. f. m. Magistro & fratribus Hospitalis Hierosol.

UNIVERSIS HABITATORIBVS
Hierosolymitanæ provincie.

Epist. 439. Ut hi quibus votum aduocandi Hierosolymam adimatur, aliquam pecuniâ ad bellam facerent nihilominus dare teneantur.

Licet quisque teneatur Domino votum reddere quod emittit, votantis tamen est attendendus affectus potius quam effectus, cum ab executione voti necessitate retrahitur quod devotè disposuerat adimplere. Cum enim ad vindicandam injuriam Iesu Christi, & terræ sanctæ succursum, universos assiduis exhortationibus invitemus, & illuc accedentibus de Dei consiliis misericordia omnium peccatorum suorum veniam & vitam promittamus æternam, nullatenus reputamus indignum, si habitatoribus ipsius, qui voverint sanctorum limina visitare, de benignitate sedis apostolicæ in terra ipsa, quæ peccatis exigentibus & rerum penuria premitur & assiduis indiget defensoribus, damus licentiam remanendi, ne, quod absit, dum personis terra ipsa minuitur, & expensis etiam vacuatur, contra Christianos prævaleant Philistæi, & diu detineant sanctuarium Domini, quod ceperunt. Quia igitur votum, cum requirit necessitas, potest & debet in pietatis opus aliud commutari, universitati vestræ auctoritate præsentium duximus indulgendum, ut si qui vestrum voverint sanctorum limina visitare, de auctoritate sedis apostolicæ à voti executione taliter se noverrint absolutos, ut expensas, quas facturi erant in via, de religiosorum virorum consilio pro reedificatione murorum & stipendiis militum sine diminutione qualibet largiantur, & pro labore itineris

dignum aliquid Domino recompensent. Datum ut supra.

In eundem modum universis habitatoribus Antiochen. provincie.

EPISCOPO ACCONEN.

Licet ad ampliandum divini nominis cultum in singulis Ecclesiis teneamur pastorem sollicitudinem adhibere, illum tamen modum in his sequi nos convenit & servare, ne minoratis Ecclesiarum facultatibus & multiplicatis expensis, ministrorum in eis numerus augeatur. Eapropter, venerabilis in Christo frater, tuis precibus annuentes, auctoritate præsentium fortius inhibemus, ne Acconen. Ecclesia, priusquam integritati, quam ante provincie orientalis occupationem habuerat, fuerit restituta, per quemquam majori fratrum numerositate gravetur quam tempore suæ felicitatis habebat. Nulli ergo omnino &c. nostræ inhibitionis &c. Datum ut supra.

Epist. 440. Ne Canonico-rum numerus augeatur ultra facultates.

SANCIO ILLUSTR
Regi Portugalsi.

In eminenti sedis apostolicæ specula disponente Domino constituti, sic nos convenit ad universos & singulos aciem nostræ considerationis extendere, ut propinqui & longè positi non remaneant apostolicæ benignitatis expertes, qui ab ea protegi cum devotione requirunt. Cum enim Rom. Ecclesia te quadam dilectionis prærogativa inter alios mundi Principes amplexetur, & tu & prædecessores tui ei semper fideles extiteritis & devoti, petitionibus tuis, quoties offeruntur nobis, quantum cum Deo possumus, tanto libentius favorem apostolicum impertimur, quanto & personam tuam & regnum tibi commissum, ut pote quod est Rom. Ecclesiæ censuale, synceriori caritate diligimus. Eapropter, carissime in Christo fili, tuis iustis precibus grato concurrentes assensu, personam tuam & regnum Portugalen. cum omnibus quæ in præsentiarum rationabiliter possides, aut in futurum iustis modis præstante Domino poteris adipisci, sub beati Petri & nostra protectione suscipimus & præsentis scripti pagina communimus. Decernimus ergo ut nulli omnino &c. Datum ut supra.

Epist. 441. Recipitur ipse & regnum & omnia bona sua sub protectione sedis apostolicæ. Vide supra epist. 99. Et infra epist. 448. & seq.